

# AFON

*gan Ysgol y Gelli, Caernarfon  
Beth am draford? gan olygydd Gwaith Maes*



## **AFON**

Bl. 6, Ysgol y Gelli, Caernarfon, 1995

## **Nant y mynydd**

yn disgleirio  
fel blaen nodwydd,  
yn troi a throelli  
drwy'r mwsogl a'r brwyn.  
Dyma guddfau  
yr eog a'r brithyll,  
a lloches  
crëyr glas gosgeiddig.



## **Rhaeadr,**

fel taran  
yn taro'n erbyn  
y cerrig a'r creigiau,  
dafnau dŵr fel conffeti  
a'r ewyn yn batrymau  
ar frig y tonnau.



## **Dinistr ...**

mae cemegau,  
carthion a sbwriel  
yn llygru'r glannau.  
Gwelwn bysgod fel dail  
ar wyneb y merddwr  
a'r afon bellach  
fel nodwydd  
wedi rhydu.

## **Beth am drafod?**

### **A**

1 Darllenwch gerddi eraill am afonydd. Dyma rai i chi:

Cân y Nant (Caradog Prichard)  
Nant y Mynydd (Ceiriog)  
Ar y Ffordd i'r Môr (J. Gwyn Griffith)

ac yn Saesneg  
The Brook (Tennyson)

2 Gwrandewch ar ddarn o gerddoriaeth sydd yn disgrifio hynt Afon Moldau yn Nhiecoslofacia o'i tharddle ymlaen. Mae'r darn yn rhan o'r dilyniant cerddorol "Ma Vlast" (Fy Ngwlad) gan y cyfansoddwr Smetana.

## **Beth sydd gan y beirdd a'r cyfansoddwr i'w ddweud neu i'w gyfleu am daith afon?**

**Sut mae rhythm y geiriau a'r gerddoriaeth yn rhan o'r mynegiant?**

**Sut mae hyn yn cymharu â disgrifiad plant Ysgol y Gelli o afon?**

### **B**

Yn rhan olaf y gerdd *Afon*, mae'r disgyblion yn disgrifio afon sydd wedi ei llygru gan ddiwydiant a'i difrodi'n llwyr gan esgeulustod dyn.

**Ai dyna mae'r llun wrth ochr y disgrifiad yn ei ddangos?**

**Ydy'r afonydd rydych chi wedi eu gweld yn debyg i'r disgrifiad neu i'r lluniau?**

**Pryd a ble welsoch chi'r afonydd hyn?**

**Wyddoch chi am afon oedd mewn cyflwr trychinebus yn y gorffennol ond sydd erbyn heddiw wedi ei hadfer?**

**Wyddoch chi pwy sydd yn gofalu am afonydd a bywyd gwyllt y dŵr a'r glannau?**

**Os na, holwch, yna cysylltwch â hwy am fwy o wybodaeth am y gwaith holl bwysig hwn.**